



Rabu, 29 Maret 2023

Ogen : Lukas 2:51



Itimbangken Maria Bas Pusuhna



Kekelengen si mbagesna sekalak nade itungtungken man anak-anakna. Erbage usaha ilakoken guna kiniulin anak. Maria e me sekalak nande si usihen man banta bas ngalaken sada kejadi si mberat entah la bagi ukur. Mulih bas Jerusalem nari meriah ukur erkiteken enggo ngendesken persembahen man Tuhan bas rumah pertoton. Sada pe la lit si tading-tanding, kerina anggota jabuna ikut rassa. Kenca sada wari erdalan mulih, salih me keriahen ndai jadi kebiaren. Anak si jadi buah bara ndube la ikut bas rombongan mulih. Idarami ku jah ku je, seh maka mulihken me ia ras perbulangenna ku Jerusalem ndaramisa. Kune sibayangken, selaku nande sigejapken uga perasaan Maria; kebiarena, kinilatihenna, langa ka cakap i bas kalak sienterem nari si banci saja nalahken ia ras sidebanna. bagem idalani Maria, seh maka jumpa mulihken ras Jesus anakna e. Kenca jumpa ras Jesus, alu ranan si tengteng ioratina kel engkai maka bage perbahanen Jesus. Ibegikenna sora pusuh Jesus, la iangkana kai situriken anakna e. I bas la iangkana e la erbahanca ia mejungut ras merawa nandangi Jesus. Mulih ia ku kutana, janah kerina sienggo jadi e itimbangkenna bas ukurna. Terbeluh ia; ngasup ertimbang, rukur tengah, bas si la iertina pe la minter ibelasina, entah ngeranai tapi nusunsa bas pusuhna. Ngasup nahan diri, emosi ras ranan. Tek ia maka lit paksana pagi iantusina si jadi e. Nande si cerdas e me nande si ngasup ertimbang bas pusuh, ukurina lebe alu mbages, mpediat Dibata erdahin mpetangkas kerinana. Ingetlah Dibata enggo mereken pusuh nande man banta segelah ngasup makekenca alu payo.

Nande, terbeluh ncibalken pusuh ertimbang alu payo